

Poloni Kolosi Imboma Pipia Topa Tirimu Ungumu Kolosi

I Ungu Torumumunga Ungu Pulu Mare

Ka ulkena molopalie wali Poloni i pipiamu topa panjirimu. Kolo toko ungu mane tiringimani enonga ungu mare Gotenga unguna tukuruku mundukolio ningi nalo imbomani konopu leko teringi ulumani ulu te naa tepili Jisas yuni kau lino manda tepa lipa Gotenga imbo toya tolima nimbe tukundo ltimu nimbelie Poloni aku tepa nimu. Jisas yu melemanga pali pulu iyemu nimbe ungu mane tirimu.

Goteni nu imbomanga mane ungu tukuruku mundurumelema naa pilko Jisas kopu teko molani nipili.

**Gotenga koinjo mololi ulu pulumu kinye we uluma kinye
pali Kraist kinye pepalie Yu melemanga pali kiyendomu**

1 ¹Na Pol, Goteni aku tepili nimumunga Kraist Jisasini nanga kongono tendepuwi nimbe lipa mundurumu iyemu, na linonga angenu Timoti kinye molopolio ²nani i pipiamu topo tiro. Eno Gotenga imbo Kolosi peremele imbo, Kraist yu paimbo ningi enge ningi ipuki tirimele angenupilima i pipiamu topo tiro. Linonga Lapa Gote yuni eno kinye konopu noipe konopu u nipili tako liko molangei nipili.

**Poloni Kolosi imboma Jisas paimbo ningi ipuki tiringi
mele pilipelie Gote kinye paa tereno nimu**

³Iltoni Gote, linonga Awili Jisas Kraistingu Lapa yu kinye konge tepolio kinye waliwalima paa tereno nimbolo. ⁴Eno Kraist Jisas paimbo ningi enge ningi ipuki tikolio Gotenga imboma pali konopu mondoromele akumunga konge terembolo. ⁵⁻⁶Gotenga ungu tukumemu eno moloringina orumu kinye Goteni enonga nimbe mulu kombuna noindirimu ltemo mele akuma

paa limolo ningokoko moromele. Pele aku nokoko moromele ulumuni eno ipuki tirimele ulumu kinye konopu mendoromele ulumu kinye, eno liengei nimu. Eno oi pulu polko Gotenga ungu tukumemu pilko Goteni eno we kondo kolorumu ungu paimboma pilkolio akumunga pulumu paa pilko kondoringi kinye yandopa aku ungu tukumemuni eno tepe kondopa ulu pengama wendo wendo opili nimo mele mai kombumanga pali aku tepe ulu pengama wendo wendo opili nimo. ⁷Goteni eno we kondo kolorumu ungu pengamu Epafrasini eno oi nimbe tirimuna pileringi. Kano iyemu yu lino peya kopu tepo kongono tepo moromolo imbomanga iye te, lino konopu mendoromolo iyemu. Yu linonga kongono tendambo nimbe Kraistinga kongono tepe kondopa tiye naa koromo iyemu. ⁸Enonga konopuna Mini Kake Teli moromomuni eno lipe tapondorumuna imboma konopu mendoromele mele kape Epafras yuni ilto nimbe tirimu.

**Enonga nimbe Gote konge tendepa enge nipili
molangei niwi nimu ungumu**

⁹Akumunga eno kinye aku tepe uluma wendo orumumunga oi pulu polko pileringbulu kinye yandopa wali wali Gote kinye enonga nimbo konge tendepolio, Goteni teangei nimbe pilipe moromo mele eno paa pilkolio, akumunga ungu puluma paa pilengei kani Mini Kake Telimu enonga konopuna molopa lipe manjilimu tipili nimbolo. ¹⁰Aku teko pilko tekole, Awilimuni eno kanopa penga pilipili kani yunge imboma tekole moromele mele aku teko tekole molko ulu penga lupe lupema awini tekole, Gote moromo mele kinye, nimo unguma kinye, pilko moromele mele paa olando pupili nimbo konge tenderembolo. ¹¹⁻¹²Eno, umbuni pembalo kinye mini naa leko, umbuni akuma pora nimbelo ningokoko molangei kani Gote enge enge paa olando tirimomunga yuni eno enge nipili molangei nimbe eno enge lupe lupema tipili. Yunge imbomanga nimbe yu iye nomi king molopa nokoromo kombu pa telimunga mele noindirimoma eno Kolosi imbomanga kape peya noindrimo linga aulkemu akirindirimu iye, akumu enonga Lapa, yu kinye paa konopu tiko paa tereno nengei nimbo Gote enonga konge tenderembolola. ¹³Yuni lino lipe tapondopa tumbulu tolina yu king molopa nokoromo iye enge nili engemunga wendo lipe, yunge konopu mendoromo Maloni melema pali nokoromo engemunga tukundo lipe mendoromu. ¹⁴Yunge Malo akumu yunge meme ondorumumuni linonga ulu pulu kerima kamukumu mainye pupili nimbe tiye kolopa, lino ka tipe ambolorumu aulkena wendo lipe we manda molangei nimu.

Kraist Yu molopa ulu teremomanga pali Yu olandopamunga ungumu

¹⁵Gote naa karomolo nalo Gotenga Malo Kraist yunge Lapa none teli iyemu. Mulu mai melema oi wendo naa opili yu oi molorumu. Melemanga

paliyu iye awili moromo. ¹⁶Aku ambe temona, muluna angimo melema kinyemaina ltemo melema kinye, karomolo melema kinyenaa karomolo melema kinye, aku mele Goteni tepo wamopo teambo nimumelema pali Malonga kimuni terimu. Enge peremo kuroma kinye, mulukombuna imbo imbi moromo imbo awilima kinye, imbi paa olandopamolopa mele awini nokoromelema kinye, engenilima kinye, aku mele paa engenilima muluna kinye mulukombuna kinyemoromelema pali kape mele mongoni karomolo melema pali peya yunge kimuni terimu. Melema paa pali Maloni kau tepa wamopa terimu. Aku melema yunge kau liepili. Yunge imbi kapi nengei nimbeaku melema terimu ¹⁷Melemanga pali yu kiyendo molorumu. Kinyelitemo melema pali yunge kina ltemo. ¹⁸Kraistingatalapeimboma yunge kangimu, Kraist yu kangimunga pinyewemu. Yu yunge kangimu koinjomoromomunga puluiyemu. Yu melemanga pali kumbe lepa moromo Malo, yumelemanga pali iye nokoli Awilimumolopili nimbe Goteni yutopamakinjirimuna yukumbe lepa makilipeola molorumu iyemu moromo. ¹⁹Gote yunu molopateremo meleaku tepea Malokinyemolomboikonopulerimunakamukumu Malo kinyepopotipe moromo. ²⁰Gotenilino mulu mai melema pali ulu pulukerimangawendolipelieu kinyemandamolangeinimbe Maloni akutembaloaulkemuakirindepilinimbe pilipelie Kraistingamememenuunjopolopeyanondonumumuni Gotenilino kinye opa pule molorumulu ulupulumukamukumutopomainye mundurumu.

²¹Oienoni ulukerimateko enongakonopumani yu kinye opapule moloringimunga Gote kinyetuletekmoloringi. ²²Nalo kinyekraist unjopolopeyanatoringinakolorumuakuulumuni Gotenienoyu kinyekonoputendekunapupilinondokoongo molangeinimu. Eno yunge imbokake telima molko, kalarote naapepa, yunikanopakeripimoulute naapepili yu moromonaongo molangeinimbelieaku terimu. ²³Nalo Kraist paimboningo ipuki tiko molkolio yu engeningo ambolko tiyenaa kolaio. Ungupengamuoi pulopolkopileringikinyepaimboningo ipukitikokanoungumuni wendombalomele kinye enomolongemele kinyenimoaku tepeamele lino kinyepaa wendopilinikingonoputikonokokomoloringimele uluumbunitewendombalokinyetiye kolongekaniwamongo likomanjikomolaio. Kano ungpengamu mai kombumangapali ningo tiringiungumu. Kraistini na Polkano ungpengamungakendemande iyemumolowinimunamoro.

Poloni Kraustingaimbotalapemu Kolosi moromelema lipetapondorumungu

²⁴Kinyenaenolipo tapondomboindo mindili norumungatonokolto. Kraustingakangimu, akumuyunge imbotalapekanomu, yunienonganimbelielipetapondopamindili norumu mele mindili mare we peremoakumuna yunge

talapemu lipo tapondambo konopu lepo Kraist mindili norumu mele nanga kangina mindili nombo manda tendero. ²⁵ Goteni na Kraistingu talape nimbe enonga nimbo lipo tapondamboi kongono tirimu. Aku kongonomu eno Goteni nimo unguma tumbi tiko pilko akumunga ungu puluma pali paa pilengei nimbo tiemboi nimbe tirimu. ²⁶ Paa koro oi walimanga pali imboma pali naa pilengei Goteni i ungumu lopeke terimu, nalo kinye yunge imboma pilengei nimbe, nimbe para tirimo. ²⁷ I lopeke terimu ungu akumu paa penga olandopa, kombumanga pali imbo lupema paa manda lipe tapondombalo mele yunge imbomani pali pilengei kani mona lepili nimbe Goteni nimbe para tirimu. Aku ungu lopeke terimumu i tepa: Kraist yu eno kinye moromo. Yu eno kinye moromomunga yuni eno Gote mulu kombuna engema peya pepili moromo akuna kopu tepo molamili lipo mepo pumbo nimuna pilkolio paimbo ningko konopu tiko nokoko moromele.

²⁸ I nio iye Kraist akumuni teremomu imbo te te nimbo, nimbo tirimolo. Eno Kraist kinye peya kopu teko molko yunge konopu enge peli imbo yuma molonge kinye mepo pumbo Gote tiemili nimbo, lipe manjili peremomuni imboma wamongo tipo lepi lepi topo mane tirimolo. ²⁹ Aku teambo nimbo yuni na enge tipe lipe tapondoromo ulumani pali enge nimbo mindili nombo kongono tero.

**Kraistingu ungumu paimbo ningko enge ningko ipuki
tiko, kolo toli unguma liko tui tinge ungumu**

2 ¹ Eno kinye, Kraistingu imbo talape Laodisia moromelema kinye, kombumanga pali imbo na oi kanopa naa ltendeli imboma kinye, eno paa lipo tapondambo nimbo mindili nombo kongono tero mele eno pilengei konopu lteo. ² Eno konopu enge nipili molko, nendo yando konopu mondonge ulumuni eno lipe popo timbelo kinye eno Kraistingu ulu puluma pali wamongo teko pilkolio paimbo ningko enge pimele mele kamukumu aku teko olando pilko molangei nimbo na paa mindili noro. Aku teko pilkolio Gotenga ungu lopeke tepa peremomunga eno pilengeila nimbo na mindili norola. Aku lopeke tepa peremo ungumu Kraist yu. ³ Lipe manjili ulu puluma kinye, konopuni pimele ulu puluma kinye,aku ulu puluma Kraist yu kinye lopeke tepa peremo. Akuma kou mone bengena lopeke tepa tengepeya tepa ltemo mele aku uluma yu kinye aku tepa peremo. ⁴ Nani imbo teni eno tope tipe kolo topa naa tipili nimbolio i ungumu eno nimbo tiro. ⁵ Na eno kinye naa moro nalo eno kinye moro konopu lepo, eno kinye kopu tepo enge ningko kongonoma tumbi tiko teko Kraist paimbo ningko enge ningko pilko tiye naa koromele mele nanga konopumuni lipo manjipolio lakopo tono kolto.

**Lino Kraist kinye peya kopu tepo molopo koinjo
molopa kondoli ulu paimbomu limolo ungumu**

⁶ Kinye, Kraist Jisas linonga Awilimu molopili, peya molamili konopuna opili ningi aku teko yu kinye peya kopu teko molaio. ⁷ Unjo te enge

nimbe angilimbeindo yunge pulkonomma maina mainye mundurumo, ulke te enge nimbe angilipili ningi timu enge nili te poromele aku mele eno Kraist kinye aku teko kopu teko angilko, linoni eno mane tirimulu unguma paimbo ningi ipuki tiko enge ningi pileringi mele olando enge ningi pilkolio, waliwalima Gotendo paa tereno neio.

⁸ Imbo teni yunge konopuna lipe manjirimo mele eno aku teko mele paa konopuni pilko molangei nimbe we unguma kolo topa eno nimbe timbelo kani kanoko kondoko molaio. Lapali kolepalemani oi mane tiringi yandopa pileringi mele kinye, kupena kinye mai kombuna molko nokoromele kuromanga unguma kinye, aku imbomani pilkolio eno ningi tinge kani. Kraistingu konopuni pimo unguma naa pilko ningi tinge.

⁹ Kraist lino mele imbo iyemu molorumu. Gote yunge molopa teremo ulu Kraist kinye tenepeye tepa ltemo mele eno liko manjiromele. ¹⁰ Kraistini yunge molopa teremo ulu lino kinye tenepeye tepa lepa manda tenderemo. Kraist yu muluna kuro enge nilima kape aku mele imbi molopa nokoromele kuroma pali pange tendepa yu olandopa moromo. ¹¹ Eno yu kinye ongo kopu teko moloringi kinye kangi pundu kopiko wendo lili ulu pulu tukumemu eno tirimuna ltingi. Aku kangi pundu kopili ulu tirimumu imbomani kangindo teremele aku ulumundo naa nimu. Kraistini tenderimu ulumuni lino kangi pundu kopipe wendo lili ulumu ltimulu, akumu lino ulu pulu keri terimulumanga oi we konopumanga engema wendo ltimu. Aku ulumu kangi kopipe wendo lili ulu tukumemu. ¹² Eno no ltingi wali Goteni Kraist kinye eno popo tipe ono terimu. Altopa eno paimbo Goteni yunge engemuni Kraist topa makinjirimu ningi ipuki tiko pileringimunga Kraist topa makinjirimu Goteni eno no ltingi wali Kraist kinye waye topa makinjirimu kala.

¹³ Eno oi we konopuma pepili ulu pulu kerima teringi kinye kape, eno Juda imboma naa molko imbo lupema moloringimunga Gotenga ungu manemani eno naa nokorumula,aku ulu taloni eno topa kondorumu, imbo kololima mele moloringi, nalo Goteni eno Kraist kinye peya koinjo molangei nimu. Yuni linonga ulu pulu kerima tiye kolopa kamukumu mainye pupili nimu. ¹⁴ Mosesini Gotenga ungu manema bukuna torumumanu linondo wali walima teko kenjirimele nimo ungu manema lino enge nimbe nokorumu engemu lino kotena ulure naa tendepili kamukumu mainye pupili topo mainye mundembo nimbeline Goteni akuma lipe Kraistingu unjo polopeyana pirimu topa uku torumu. ¹⁵ Kuro enge nilima kape, aku mele imbi peremonna melema nokoromelema pali enonga engema unjo polopeyana kolorumumunga topa mainye mundupe, kuromanga enge te naa pepa kamukumu mainye purumu lepamo ningi kanangei nimbe eno lipe ondorumu.

Kraist kinye peya kolorumulungu we ungu manemani lino naa lipe tapondoromo ungumu

¹⁶ Yuni aku terimu kani imbo teni lino langi nombo no nombo wali kake telimanga uluma tepo, oli ondoromo kinye uluma tepo, koro mololi

Sabat walimanga uluma tepo, aku ulumanga imbo teni temolo mele moke tepa ungu mane te naa nimbe panjipe, iri topa teko kenjirimele nimbe naa nipili neio. ¹⁷Ulu akuma teangei ningoi ungu manema ningi panjiringi akuma altopa wendo ombalo ulu te manda manjiko aku uluma teringi. Aku ulumanga paimbo ulumu Kraist kinye peremo. ¹⁸Imbo te kumbu tepa kanoromo melema temane topa yu yunu konopu tiembo kani nanga imbi ola naa molopili molambo nimbe kolo topa, enselemanga imbi lipe ola mundupe kapi nimo imbo teni aku tepo teromunga na nanu lipe manjili olando peremo nimbe enoni teko kenjirimelemunga Goteni eno melema naa timbelo linge nimbelo kinye yunge ungumu naa pileio! Kano imbomu yu yunu yunge oia konopumuni aku tepe pimo. ¹⁹Kano imbomu yu lino Kraistinga kangi moromolomunga pinyewe Kraist kinye ingi tipe naa amboromo. Aku iye pinyewemuni kimbo ki kangi melema pali nokopa, ombele pulkono melema pali enge nipili nimbe langi tirimo. Aku teremomunga Gotenga engemuni Kraistinga kangimu tepa akondoromo.

²⁰⁻²¹Eno Kraist kinye peya kolkolio mai kombuna ulu keri kerima kamukumu tiye koloringi tendekuna manda naa molongemunga ambe temona kinye eno ya mai kombuna imboma mele molko mai kombuna ungu manema pilko liko teko moromeleya? Ungu manemani langi mare kinye no mare kinye akumando naa ambolaio nimbe, naa naio nimbe, kini lope naa tendaio nimo aku ungu manema ambe telka pilko liko teremeleya? ²²Aku ungu manema pali maina imboman kau konopuni pilko i teko teaio, i teko teaio ningoi ungu mane tirimelemunga aku ungu manemani pilko teaio nimele melema kinye ulu mare teremele kinye walitikale kamukumu keri lepa beambo nimo. Kano melemani eno lipe tapondombalo ulu te naa peremo. ²³Aku ungu manemani lino imbi naa molopili molamili ningi, melema kapi ningi imbi liko ola munduko, linonga kangima mindili nopili nengei ningi ulu mare aku teko teremele mele kanokolio aku ungu manema lipe manjili paa pepa penga Itemo paimbo nimbo karomolo. Nalo lino oi konopumuni ulu kerima kau pilipo ulu pulu kerima kau konopu teremo uluma topo manye mundemili nimbe lipe tapondombalo ulu te kano ungu manema kinye paa naa peremo.

Ulu kake telima tepo molomolo mele ungu mane mare

3 ¹Goteni eno Kraist kinye peya topa makinjirimu kani Kraist wi ola pinje pinje lepili kumbe tundu mongona liko mundeo. ²Mulu kombuna melema kau paa konopu kimbo tiko, mai kombuna melema konopu naa kimbo tiko molaio. ³Eno Kraist kinye kolkolio yu kinye tukundo koinjo moromelemunga Gote kinye kopu teremele kani muluna ola Itemo uluma

konopu kimbo tiko molaio. ⁴Enonga koinjo moromele ulu pulumu Kraist yu. Akumunga yu ombo mona angilimbelo wali eno yu kinye peya molko, yu pa enge nimbe teremo kombuna yu iye awili olando molopa engema noipe melema nokoromo kombuna yu kinye peya wendo ongo angilinge.

**Eno imbo koinjoma molkolio ulu pulu kerima
tiye kolaio nimbe tirimu ungumu**

⁵Akumunga enonga oi konopuma Kraist kinye peya kolkolio yu peya makilko koinjo moloringi kani maina ulu enonga konopumani pilkolio tengindo aie konopu ltemele uluma tiye kolaio! Ulu akuma i tepe: Wapu ulu kerinali teremele. We melema kape wali wali konopu kimbo tiko moromele. Ambomani iye pengama kanoko peya tapu topo andolembalanje paa konopu ltemele. Iyemani amboma kanoko konopu mondoromele. Imbo lupemanga melema kumo meremele. Aku imbo lupemanga melema kumo meremele uluma kinye, kuroma kinye gote kolo tolima kinye popo toko kapi nimele uluma kinye, aku ulu talo tendeku ulu teremo. ⁶Imbomani yunge ungumu pilko tui tiko aku ulu pulu kerima teremelemunga Goteni imboma mumindili kolopa tombo nimbe tumbi tipe noirimo. ⁷We maina imboma teko moromele mele oi eno kape aku teko ulu kerima kau teko moloringi. ⁸Nalo kinye aku uluma naa teamili ningi tiye kolaio. Imbo mumindili kolko, imbo iri toko, imbomare kinye konopu keri leko, ungu tako tondoko, owe teangei ningi kauwe ungu ningi, aku ulu puluma tiye kolaio. ⁹⁻¹⁰Oi konopuma kinye aku konopumani pilko teringi uluma kinye tiye kolko, imbo koinjoma molamili ningi Kraist ltingimunga eno imbo koinjoma tepe wamopa Goteni koinjo mundurumu, yandopa yandopa yu moromo mele eno olando olando pilkolio aku teko molaio nimbe aku teremo kani nendo yando kolo naa taio. ¹¹Goteni yunu imbo koinjoma peya pali tepe wamopa teremomunga lino imbo koinjoma mele moromolo imboma tendeku tipo moromolo. Na Juda imbomu, na Grik imbomu. Na kangi kopili imbomu, na kangi naa kopili imbomu. Lino kombu lupe lupe imboma, lino ungu lupe lupe nili imboma. Na kongono kendemande we teli imbomu, na we mololi imbomu. Linoni aku konopu naa leamili. Kraist yu tendekumu kau moromo. Akumunga yu lino peya kinye kopu tepe moromo.

**Imboma konopu mondoli uluma lipo ambolopo Kraistinga
unguma lino kinye pepili molamili ungumu**

¹²Eno Goteni nanga imboma nimbe kanopa ltimu imbo konopu awili tepe mondopa, konopu kake tepe peli imboma nimbe karomo imboma moromele kani imbo lupema kondo kolko liko tapondoko, takaliko

molko mumindili naa kolaio. Imbomareni eno teko kenjinge lemo mumindili welea naa kolaio.¹³ Enonga angenu teni eno tepa kenjipe ulu tepa mumindili kondoli ulu te tembalo wali eno yundo ungu te naa ningi, tiye kolaio. Eno Gote teko kenjiringi ulu pulu kerima yu we tiye kolopa kano ulu pulu kerima na naa pilipo molambo nimu mele eno aku teko imbomani eno teko kenjinge uluma tiye kolko we molaio.¹⁴ Nalo aku ulu pulu penga nio ulu pulumanga pali konopu mondoli ulu pulumu paa olando peremo kani imboma konopu paa mondaio. Aku tengi wali aku teko ulu pulu penga tengema pali we tumbi tiko paa manda teko molonge.

¹⁵ Kraistainga imboma kinye konopu tendekuna pupili konopu u nili ulu pulumu Kraistini tirimo aku ulu pulumuni eno aku teko taku liko konopu wango nipili molaio nimbe ombe nokopili. Kangi tendekumunga kimbo ki melema lupe lupe angimo nalo kangi tendekumu kau angimo aku mele eno imboma pali tendeku mele molangei nimbe Goteni eno waio nimbe Itimu. Gote waliwalima paa tereno ningi molaio.¹⁶ Kraistainga unguma enonga konopuna paa tengepuya tepa pepili molangei aku teko molkolio eno lipe manjilimu pepili enoni imboma ungu mane tiko, imboma ulu keri pengama pali moke teko kanangei ningi tiko, Goteni enonga nimbe tenderemomunga yu kinye paa tereno ningeindo Gotenga bukuna moromo kunanama kinye, nombeya teko Gote kapi nimele kunanama kinye, Mini Kake Telimuni enonga konopuna nimbe tirimona pimele kunanama kinye, neio.¹⁷ Ungu ningi uluma teko kongono tengi ulu akuma pali tengendo i ulumani Awili Jisasinga imbi kapi nindemili ningi aku uluma teko, Lapa Gote kinye paa tereno neio.

Kristen ambo iyema kinye enonga bakuluma kinye tengi ungumu

¹⁸ Eno amboma, enonga omenali iyemanga unguma taku liko pilko liko molaio. Aku ulumu Awilimuni kanopa penga pimo ulu pulu te kani aku teaio.

¹⁹ Eno iyema, enonga amboma konopu mondoko eno teko mumindili kondoko iri naa toko molaio.

²⁰ Bakuluma, eno aminyeli lanielini ninge unguma pali waliwalima pilko tengi tiko teko molaio. Aku ulumu Awilimuni kanopa konopu tirimo.

²¹ Eno lapali, bakuluma eno ulu penga te manda naa temolo konopu lenge kani enonga bakuluma teko mumindili naa kondaio.

Poloni kongono kendemande imboma kinye enonga nokoli iyema kinye teangei nimu ungumu

²² Kongono we tendeli kendemande imboma, enonga kongono nokoli maina imbomani ninge unguma pali pilko liko teaio. Nokoli imboma

kanoko molangei kongono tepo kondombo kinye kanokolio kapi nengei ningko kongono naa teao. Kraistainga ungumu liko awili tiko pilko liko teremele mele aku teko kongono nokoli imbomani teao ninge unguma pilko liko kongono konopu tiko teko kondaio.²³⁻²⁴ Eno konopu talo tepa pepili enonga kongono nokoli imbomanga kongono naa tendaio. Kongono tengema pali tenegeindo Awilimunga kongono tenderemolo lepamo ningo aku teko kongono nokoli iye kanomanga kongonoma konopu penga pepili toya toko tendaio. Maina imbomanga kongono kau tenderemolo, akumu ulure molo ningo kongono naa teao. Awilimuni yunge imboma mele timbeindo noindirimo mele pengama lino timbelo ningo pilkolio konopu penga pepili kongono nokoli iyemanga kongono toya toko tendaio. Kraistainga kongono kendemande tenderemele. Yu enonga Iye Nokoli Awilimu konopu leao.²⁵ Awilimuni imbo palinga ulu teremelema pali tendeku tipe moke teremo akumunga teko kenjinge imboma pali teko kenjingemunga melema aku tepa timbelo.

4 ¹Kongono nokoli imboma, enonga kongono we tendeli kendemande imboma taka liko nokoko kondoko, teko mini naa ltendaio. Enonga Nokoli Iye te mulu kombuna moromomu liko manjeio.

**Gote kinye ungu nimo ulumu enge ningo ambolko
molko kondangei nimu ungumu**

²Gote kinye paa waliwalima konge ningo tiye naa kolko molaio. Gote kinye konge ningei wali konopu liko munduko Gote kinye paa tereno ningo molaio. ³Gote kinye konge ningo molkolio linonga kape konge tendekolio, lino yunge ungu pengamu andopo nimbo tiemili aulke te lipe ondopili neio. Aku ungumu Kraistainga ungumu, akumu paa oi lopeke tepe perimu. Aku ungumu nimbo tirumunga na ka ulkena panjirimelle.

⁴Gote kinye nanga konge tendekolio Kraistainga ungu lopeke tepe perimumu imboma paa tumbi tiko pilengei nimbo para tipo nemboi neio. Naaku tepe kongono teamboi nimbe Goteni tirimu kani teko konge tendaio. ⁵Kraistainga imbo talapena naa molko tawendo moromele imboma eno Kraistainga imbo moromelemani kanoko kondoko aulke andoko konopu penga leko uluma toya toko Kraistainga ulu pengama liko ondaio. ⁶Eno ungu ningo tingema waliwalima yakela kolko paa pilemilia ningo komu tendengei ungu pengama neio. Imbomani waltindinge wali linoni ungu pengama topondopo nemili ningo aku teko neio.

**Poloni Tikikus kinye Onesimus talo Kolosi imboma
moloringina lipe mundurumu ungumu**

⁷Lino paa konopu mondomolo angenu Tikikus ombalo wali na moro mele pali eno temane topa timbelo. Yu Awilimunga kongono paa tendepa tiye naa kolopa, lino kinye peya popo tipo teremolo iyemu. ⁸Yu aku

tepa popo tipo kongono peya teremolomunga lino moromolo mele eno pilengei, eno konopu enge tipili nimbo nani yu eno moromelena lipo munduro. ⁹Enonga iye te, linoni konopu mondoromolo angenu kongono paa tepa kondopa tiye naa koromo iye Onesimus yu Tikikus kinye peya lipo munduro. Ya lino moromolona ulu wendo oromoma pali eno ningotingele.

**Pol kinye iye mare kinye enoni Kolosi imbomando
molko kondaio ningi ungumu**

¹⁰Na peya ka ulkena perembolo iye Aristarkasini eno molko kondaio nimbe, nimbe mundurumo. Barnabasinga pelepa Mak ya kopu tepo moromolo iyemuni eno molko kondaio nimbe, nimbe mundurumola. Mak kinye eno tenge mele oi nimbo munduru kanomu. Eno molongena omo lemo tono kolko peya molamili owi neio. ¹¹Iye te, yunge imbi Jisas, aku iyemu yunge imbi te Jastus nimele, aku iyemuni eno molko kondaio nimbe mundurumola. Gote iye nomi king molopa melema nokombalomunga nimbo tiro kongonomu na liko tapondoko peya teremele imbomangaaku iyema kau Juda iyema. Aku iyemani kongono enge nimbo teambo ningoo paa liko tapondoromele. ¹²Epafras, eno Kolosi imbomanga iye te, yuni kape eno molko kondaio nimbe, nimbe mundurumo. Yu Kraist Jisasinga kongono tendeli iye te molopa, Gote kinye konge nimbe molopili tiye naa kolopa waliwalima enonga nimbe enge nimbe konge tendepalie eno Kraistingu imbo yuma molko, paimbo ningoo enge ningoo pilko moromele mele konopu alowa malowa naa tekogote kanopa penga pilimbelo ulu teao nimoma pilko liko tengeindo enge ningoo tekogote molangei nimo. ¹³Yuni enonga kape, Laodisia imbomanga kape Hierapolis imbomanga kape, eno lipo tapondambo nimbe paa kongono mindili nomba teremo akumu eno paa pilengei nimbo nio. ¹⁴Linonga konopu mondoromolo iye dokta Lukuni eno molko kondaio nimola. Iye Demasini aku tepa nimola. ¹⁵Linonga angenupili ulke kombu Laodisia moromelema kinye ambo Nimba kinye Kraistingu imbo talape yunge ulkena maku toko moromele imbomando eno molko kondaio nindeio.

¹⁶Eno Kolosi imboma i pipiamu pilengei kambu tondoko pora tingewali Kraistingu imbo talape Laodisia moromelema kanoko pilengei ningotiko mundeio. Laodisia imboma pipia topo tirumu eno kanangei kani lino kanamili ningoo yando tieio neio.

¹⁷Arkibusindo i tekoo ningoo tieio. Nu Awilimunga kongono tendewi ningoo tiringimu paa pali tepo pora tiembo ningoo enge ningoo teani neio.

¹⁸Na Pol nanu i pipiamu topo eno molko kondaio nio. Na ka ulkena we pero mele komu naa tindeio. Goteni eno kinye konopu noipe molopili molaio.